



## Wanafunzi wa Mwalimu wa Mbinguni

**T**umemwona Masihi (maana yake, Kristo).—Yohana 1:41.

Wanafunzi wawili wa Yohana walikuwa wamesimama karibu naye, Yohana akamwona tena Yesu miongoni mwa watu. Mara tena uso wake ukaangazwa kwa utukufu wa mbinguni, alipopaza sauti yake na kusema: “Tazama Mwana-kondoo wa Mungu!” Maneno hayo yaliamsha mioyo ya wanafunzi. Wanafunzi Wake hawakuyafahamu sawasawa. Maana ya jina hilo Yohana analomwita, “Mwana Kondoo wa Mungu ni nini?” Yohana mwenyewe hakulifafanua.

Walipomwacha Yohana walikwenda kumtafuta Yesu. Mmojawapo alikuwa Andrea, nduguye Simoni; mwingine alikuwa Yohana mwinjilisti. Watu hawa ndio walikuwa wanafunzi wa Yesu wa kwanza. Walimfuata Yesu wakiwa na hamu ya kusema Naye, walakini waliogopa, wakanyamaza tu, hayo yakabaki mawazoni, “Je, huyu ndiye Masihi?”

Yesu alifahamu kuwa watu wawili hawa walikuwa wakimfuata. Wao ndio walikuwa matunda Yake ya kwanza katika kazi Yake, na kulikuwa na furaha moyoni mwa Mwalimu huyu wa mbinguni kwa kuwa roho hizi ziliitikia neema Yake. Lakini akiwageukia, aliwauliza: “Mnatafuta nini?” Angeweza kuwaacha huru warudi nyuma au wazungumze tamanio lao.

Walikuwa na kusudi moja tu. Uwepo Wake ulijaza mawazo yao. Wakasema “Rabi, (Maana yake mwalimu) ... unakaa wapi?” Kwa mazungumzo mafupi wakiwa hapo njiani, hawakupokea kile ambacho walikuwa wakikitamani. Walitamani kuishi na Yesu, na kusikia maneno Yake. “Aliwaambia, njooni, mwone. Walikuja, wakaona anapoishi, wakakaa naye siku hiyo.”

Kama Yohana na Andrea wangekuwa na mioyo isiyoamini, kama walivyokuwa makuhani na wakuu, wasingekuwa wameketi kama wanafunzi miguuni pa Yesu. Wangukuja kama wakosoaji, ili kupima maneno yake. Kwa namna hiyo wengi hufunga mlango kwa fursa nyingi za thamani. Lakini wanafunzi hawa wa kwanza hawakufanya hivyo. Waliitikia mwito wa Roho kwa njia ya mahubiri ya Yohana Mbatizaji. Sasa waliitambua sauti ya Mwalimu wa mbinguni. Kwao, maneno ya Yesu yalikuwa mazuri, dhahiri na mapya. Nuru ya mbinguni ilianguka katika Agano la Kale na kuwaelimisha maneno yake. Mada za kina za ukweli zikadhihirika nuruni.

Ni kwa moyo wa kutubu na imani na upendo ndipo roho huwezesha kupokea hekima kutoka mbinguni. Imani ifanyayo kazi kwa upendo ni ufunguo wa maarifa, na kila mwenye upendo “anamjua Mungu” (1 Yohana 4:7)....

Siku ya pili yake Yesu alipokuwa akienda Galilaya, alimwona Filipo akamwambia, “Nifuata,” Filipo alitii amri hiyo mara moja, naye akawa mtendakazi wa Kristo (Tumaini la Vizazi Vyote, sehemu ya 1, uk. 116–118).